



**LALANA FEHIZORO laharana faha 2014-018 tamin'ny ... 2014
mifehy ny tandrifim-pahefana, ny fombafomba fandaminana
sy ny fomba fiasan'ny vondrombahoakam-paritra itsinjaram-pahefana,
ary ny fitantanana ny raharahany manokana.**

FILAZANA NY ANTONANTONY

Ny Lalampanorenana tamin'ny 11 desambra 2010 eo amin'ny andininy faha 88 teboka efatra dia mametraka fa ny fitsipika mifehy ny tandrifim-pahefana, ny fombafomba fandaminana sy fiasan'ireo vondrombahoakam-paritra itsinjaram-pahefana ary fitantanana ny raharahany manokana dia feran'ny lalana fehizoro.

Ity lalana fehizoro ity, izay maneho ny fampiarana izany fepetra izany, no anombohana an'ireo dingana fandrafetana ny didy aman-dalana momba ny Vondrombahoakam-paritra itsinjaram-pahefana ao anatin'ny Repoblika faha efatra. Izy no mamaritra ny sehatra fototry ny sori-dalan'ny politikan'ny Fitsinjaram-pahefana eto Madagasikara ho fampiharana ny Fitsinjaram-pahefana tena izy sy ny fampandrosoana ifotony.

Amin'izany, ity lalana fehizoro ity no mamaritra ny sehatra fitantanana ny raharaha ifoton'ireo Vondrombahoakam-paritra itsinjaram-pahefana, indrindra ny fitsipika mifehy ireo fahefana sy tandrifim-pahefana, ny fombafomba fandaminana sy fiasan'ireo Vondrombahoakam-paritra itsinjaram-pahefana ary ny fepetra fanohanana mba iantohana ny fitoviana eo amin'izy ireo.

Ny tombony amin'ity lalana fehizoro ity dia :

- ny fanamafisana ireo efa nananana momba ny zotra ny fitsinjaram-pahefana natao teto Madagasikara;
- fanasongadinana ny fananganana ny asam-panjakana eny anivon'ny Vondrombahoakam-paritra itsinjaram-pahefana ary koa ny ivon-toerana fanofanana voatokana ho an'izany ;
- Fametrahana ny lasitra araky ny lalana ny fiaraha-miombon'antoka eo amin'ny sehatra miankina sy tsy miankina ary koa ny fiaraha-miasa eo amin'ny Vondrombahoakam-paritra itsinjaram-pahefana na amin'ny samy eto antoerana na amin'ny any ivelany.

Ity lalàna fehizoro ity, misy andininy efatra amby dimampolo, dia mitsinjara ho toko enina izay manazava ny momba ireto:

- ny fepetra ankapobeny;
- ny amin'ireo fitsipika mifehy ny fananganana sy famaritana ny vondrombahoakam-paritra itsinjaram-pahefana ;
- ny amin'ny fahefana sy ny tandrifim-pahefan'ireo vondrombahoakam-paritra itsinjaram-pahefana ;
- ny amin'ny fombafomba fandaminana ny vondrombahoakam-paritra itsinjaram-pahefana ;
- ny amin'ireo fombafomba fampandehanan-draharaha eny amin'ny vondrombahoakam-paritra itsinjaram-pahefana ;
- fepetra farany.

Antananarivo,faha



**LALANA FEHIZORO laharana faha 2014-018 tamin'ny oktobra 2014
mifehy ny tandrifim-pahefana, ny fombafomba fandaminana sy ny fomba fiasan'ny
vondrombahoakam-paritra itsinjaram-pahefana,
ary ny fitantanana ny raharahany manokana.**

Ny antenimieram-pirenena no nandany tamin'ny fivoriana nataony tamin'ny alakamisy 14 aogositra 2014,

NY FILOHAN'NY REPOBLIKA,

Araka ny Lalam-panorenana ;

Araka ny fanapahana laharana faha 23 - HCC/D3 tamin'ny 10 septambra 2014 noraisin'ny Fitsarana Avo momba ny Lalàmpanorenana,

NO MAMOAKA HAMPANAN-KERY NY LALANA IZAY TOY IZAO NY ANDININDININY :

**TOKO VOALOHANY
FEPETRA ANKAPOBENY**

Andininy volohany – Ity lalana fehizoro ity no mametra ny fitsipika mifehy ny tandrifim-pahefana, ny fombafomba fandaminana sy ny fomba fiasan'ny vondrombahoakam-paritra itsinjaram-pahefana, ary lasitry ny fitantanana ny raharahany manokana.

And. 2 – Araka izay volaza ao amin'ny andininy faha143 ao amin'ny Lalampanorenana, ny vondrombahoakam-paritra itsinjaram-pahefanaeto amin'ny Repoblikan'i Madagasikara dia ny Kaominina, ny Faritra ary ny Faritany.
Ny fananganana, ny isa, ny famaritana, ny fiantsoana ary ny renivohitrana'ireo vondrombahoakam-paritra itsinjaram-pahefana dia faritan'ny lalàna.

And. 3 –Ny politikan'ny fitsinjaram-pahefana dia fandaharan'asa notapahina sy narindra ho an'ny fampandrosoana iaraha-manao, mirindra sy milaminany tanin'ny Repoblika.

Ny tanjon'ny fitsinjaram-pahefana dia ny miantoka ny fampiroboroboana ny fampandrosoana ny lafitany amin'ny alalan'ny fikarohana fomba fampandraisana anjara sy ny fanetsiketsehana ny mponinaamin'ny ambaratonga rehetra.

And.4 – Ny fitsinjaram-pahefana dia miseho amin'ny alalan'ny famindrana amin'ireo vondrombahoakam-paritra itsinjaram-pahefana ny tandrifim-pahefana manokana ho an'izy ireo izay miavaka amin'ny an'ny Fanjakana.

Ny vondrombahoakam-paritra itsinjaram-pahefana dia manana fahefana hamoaka didy amampitsika ka ny fanapahan-kevitra raisin'izy ireo amin'izany dia iharan'ny fanaraha-masony fanarahan-dalàna atao aorian'ny namoahana azy.

And. 5 –Ao anatin'ny fanatanterahana ny fitsinjaram-pahefana, ny Fanjakana dia tsy maintsy mametraka, ao anatin'ny fe-potoana izay faritan'ny lalana, ny fanovan-drafitra na eo amin'ny fandaminana ny lafitany na eo amin'ny rafitra eo anivon'ny foibe, mba hampiroboroboana ny politika fanajariana ny tanyho fanovanaendrika ny tanin'ny Repoblika, arakaraky ny fitakiana iantohana ny fahombiazanaho fampandrosoana mitohy, iaraha-manao, mifandanja ary mirindra.

Amin'izany, fomba fanaovanateti-pivoaranaifanarahana no miantoka ny fampidirana manontolo, ny fifandraisana ary ny fifamenoan'ireo fandaharan'asa fampiasam-bolam-panjakana miaraka amin'ny ambaratongana vondrombahoakam-paritra itsinjaram-pahefana tsirairay sy eo amin'ny samy vondrombahoakam-paritra itsinjaram-pahefana.

Araka izany, ny vondrombahoakam-paritra itsinjaram-pahefana tsirairay dia tsy maintsy manana fandaharan'asa ho an'ny taona maro momba ny fampiasam-bolam-panjakana tapahin'ny Filankevitri'izy ireo tsirairay avy, ary azo avaozina isan-taona mandritra ny fotoam-pivoriana voalohany.

And.6 –Ny fitsinjaram-pahefana dia ampiarahina amin'ny fanaparahana ny sampandraharahan-panjakana mba ho fanamafisana ny fahafaha-manaon'ireo vondrombahoakam-paritra itsinjaram-pahefana. Amin'izany, ny rafitra fitsinjaram-pahefana iray dia tsy maintsy mifanandrify amin'ny rafitra fanaparaham-pitondrana iray.

Ny fandaminana ny lafitany ny fitsinjaram andraikitra eo amin'ireo fitondran-draharahan-panjakana foibe sy ny sampandraharaha anaparaham-pitondrana dia alamina araka ireo fotokevitra feran'izao lalàna fehizoro izao.

And. 7 –Araka ny fepetra voalazan'ny andininy faha 145 ny Lalampnanorenana, ny lalàna no mifehy ny fisoloantenam-panjakana eny anivon'ny vondrombahoakam-paritra itsinjaram-pahefana. Io lalàna io no mametra ny karazan'ireo fanapahan-kevitra iharan'ny fanaraha-maso ny fanarahan-dalàna sy ny fombafomba fanatanterahana izany fanaraha-maso izany.

TOKO FAHAROA

NY AMIN'IREO FITSIPIKA MIFEHY NY FANANGANANA SY FAMARITANA

NY VONDROMBAHOAKAM-PARITRA ITSINJARAM-PAHEFANA

And.8 –Araka ny fepetra voalazan'ny andininy faha-143 andalana faharoa amin'ny Lalampnanorenana, ny fananganana sy ny famaritana ny vondrombahoakam-paritra itsinjaram-pahefana dia tsy maintsymamaly ireo masontsivana fitoviana ara-jeografika, ara-toekarena, ara-piaraha-monina sy ara-kolontsaina.

And. 9 –Ny fampiharana ireo masontsivana momba ny famoronana sy ny famaritana voalaza ao amin'ny andininy fahavalo etsy ambony dia tsy maintsy mifantoka amin'ny :

- 1- ny firaisan-kina ara-piaraha-monin'ny vondrombahoakam-paritra itsinjaram-pahefana tsirairay manana fototra ara-jeografika izay mitarikany fiheverana ho zava-dehibe ireo anton-javatra ara-piaraha-monina sy ara-kolontsaina.
- 2- ny zava-misy ara-bohon-tany ka ny velaran-tany sy ny endrika ara-jeografikan'ny vondrombahoakam-paritra itsinjaram-pahefana tsirairaydia tsy maintsy raisina ho zava-

dehibe miaraka amin'nyfahafahana mifandray, ny fivangongoana sy ny fivezivezen'ny mponina. Ireo fiheverana ireo dia tsy maintsy ahafahana mametraka fampandrosoana marina eo anivon'ny lafitany ary miantoka fandrakofana ara-pitantanan-draharaham-panjakana mahomby eo amin'ny tanim-pirenena manontolo.

- 3- ny fironanaara-piaraha-monina sy ara-toekarena ary ny otrikaren'ny vondrombahoakam-paritra itsinjaram-pahefana tsirairay avy mba ahafahana mitrandraka misimisy kokoa ireoy zavatra mampiavaka ny eny an-toerana, mba hampiroboroboana ny fiaraha-miasa eo amin'ireo samy vondrombahoakam-paritra amin'ny alalan'ny fandrindrana ireo asa ara-piaraha-monina sy ara-toe-karena, ary mba iantohana ny fahavelomana arabolan'ireo vondrombahoakam-paritra itsinjaram-pahefana.

And. 10 – Ny Faritany dia mamondrona Faritra roa na maromaro.

Ny Faritra dia mamondrona Kaominina maromaro.

Ny Kaominina dia mamondrona Fokontany maromaro, ka ny fandaminana, ny fomba fiasany ary ny anjara andraikiny dia faritana amin'ny alalan'ny didy amam-pitsika.

And. 11–Lalana no mametra ny fitsipika mikasika ny sata manokan'ny Renivohitry ny Repoblika sy ireo vondrombahoakam-paritra itsinjaram-pahefana sasantsasany izay mitaky fepetra manokana noho nyendrinyara-jeografika, ny fivelaran'ny tanàna, ny fitomboan'ny mponina miavaka ary ny firaisan-kina voajanaharyeo amin'ny toerana.

TOKO FAHATELO NY AMIN'NY FAHEFANA SY NY TANDRIFIM-PAHEFAN'IREO VONDROMBAHOAKAM-PARITRA ITSINJARAM-PAHEFANA

Sokajy voalohany Ny amin'ny ankapobeny

And. 12 –Ity toko ity no mifehy ny fahefana sy ny tandrifim-pahefana omena ireo vondrombahoakam-paritra itsinjaram-pahefana.

And. 13 –Ny vondrombahoakam-paritra itsinjaram-pahefana dia sombiny amin'ny tanim-pirenena, ka ny fitambaran'ny mponina ao aminy no mitantana ny raharaha izay nomen'ny Lalàmpanorenana sy ny lalàna azy ireo,mba ho hampiroboroboana ny fampandrosoana ara-toekarena, ara-piaraha-monina,ara-kolon-tsaina, ara-tsiantifika sy ara-tekinolojia.

And. 14 –Araka ny voalazan'ny andininy faha-141 ao amin'ny Lalàmpanorenana, ny Vondrombahoakam-paritra itsinjaram-pahefana no miantoka,miaraka amin'ny fanohanan'ny Fanjakana,ny filaminam-bahoaka, ny fiarovana ny olom-pirenena, ny fitantanandraharaham-panjakana, ny fanajariana ny tany, ny fampandrosoana ara-toekarena, ny fikajiana ny tontolo iainana sy ny fantsarana ny seha-piainana.

And. 15 –Ny fampiharana ny tandrifim-pahefana sy ny andraikitr'ireo vondrombahoakam-paritra itsinjaram-pahefana dia atao amin'ny alalan'ny fampandraisana anjara ny rehetra ary ao anatin'ny mangarahara tanteraka.

Amin'izany, ny vondrombahoakam-paritra itsinjaram-pahefana dia tsy maintsy mametraka rafitra fikaonan-doha.

Ny fombafomba fampiharana ity andininy ity dia faritana amin'ny alalan'ny didy amam-pitsika.

Sokajy faharoa
Ny amin'ny fitsipika fitsinjarana ny tandrifim-pahefan'ireo
Vondrombahoakam-paritra itsinjaram-pahefana

And. 16 –Ny fitsinjarana ny tandrifim-pahefana eo amin'ny Fanjakana sy ireo vondrombahoakam-paritra itsinjaram-pahefana dia tsy maintsymifantoka amin'ny tombontsoam-pirenena sy ny tombontsoaeny ifotony.

Amin'izany, ny famindrana marina ny tandrifim-pahefana dia atao arakaraka ny fironan-dehibe takian'ny ambaratonga-na vondrombahoakam-paritra itsinjaram-pahefana tsirairay.

Ny lalàna no mametra ny fombafomba fampiharana ity andininy ity.

And. 17 – Na amin'inona na amin'inona, ny fitsinjarana ny tandrifim-pahefana dia tsy mahazo manohintohina ny fahambonian'ny Fanjakana amin'ireo asa mahafanjakana ny Fanjakana, dia ny fanontana sy famoahana vola, ny fiarovam-pirenena, ny fifandraisana ara-diplomatika, ny fitantanana ireo harena « stratejika », izay hofaritana sy hoferan'ny lalàna, ny Fitsarana sy ny fitandroana ny fandriam-pahalemana sy ny filaminam-bahoaka.

Ny Fanjakana no mametraka ireo fepetra ilaina sy mety amin'ny fanatontosana ny fampandrosoana mitohy sy iaraha-manao ny firenena. Anjarany ny mamolavola sy mampiroborobo ny politikan'ny fanajariana ny tany ao anatin'ny fametrahana sy ny fanatanterahana ny fitsinjaram-pahefana tena izy. Ho fanatrarana izany, ny Fanjakana no miantoka ny fanatanterahana ny paikadim-pirenena ho fampandrosoana ny eny ifotony.

Amin'izany, ny Fanjakana irery ihany no manana ny fahefana famoahana didy ankapobeny. Izy no mametra amin'ny alalan'ny didy aman-dalàna ireo fepetra fampiharana ny tandrifim-pahefan'ny vondrombahoakam-paritra itsinjaram-pahefana.

And. 18 – Ny vondrombahoakam-paritra itsinjaram-pahefana dia mizaka tena amin'ireo tandrifim-pahefana nomena azy araka ny Lalàmpanorenana sy ny lalàna.

And. 19 – Ny vondrombahoakam-paritra itsinjaram-pahefana dia mizaka tena raha mitaha amin'ireo vondrombahoakam-paritra hafa, ary tsy misy ny fatotra na fifandraisana an-tanatohatra amin'izy ireo.

Na izany aza, ny fifandraisana ara-pifanekena dia azo tanterahina eo amin'ireo vondrombahoaka itsinjaram-pahefana mitovy na samy hafa ambaratonga.

And. 20 – Raha tsy mahakasika(ao anatin'ny fanajana) ny fifanarahana iraisam-pirenena nataon'i Madagasikara ary ao anatin'ny tandrifim-pahefana noferan'ny didy aman-dalàna manan-kery, ny vondrombahoakam-paritra itsinjaram-pahefana sy/na ny fivondronan'izy ireo dia afaka manao fifanekena amin'ireo vondrombahoakam-paritras itsinjaram-pahefana any ivelany sy/na ny fivondronan'izy ireo mba hanatanterahana fiaraha-miasa

Ny fombafomba fampiharana ityandininy ity dia ferana amin'ny alalan'ny didy amam-pitsika.

And. 21 – Ny fiarahamiombon'antokin'ireo vondrombahoakam-paritra itsinjaram-pahefana amin'ny sehatra tsy miankina dia tsy maintsy atao amin'ny alalan'ny fifanarahana nankatoavin'ny fanapahana noraisin'ny Filan-kevitra ny vondrombahoaka voakasika. Ny loharanombola sy ny

fandaniana vokatr'izany fiarahamiombon'antoka izany dia tsy maintsy soratana ao amin'ny tetibolan'ny vondrombahoakam-paritra itsinjaram-pahefana voakasika.

Ny fombafomba fampiharana ity andininy ity dia ferana amin'ny alalan'ny didy amam-pitsika.

And. 22 – Ny famindrana ny tandrifim-pahefana eo amin'ny Fanjakana sy ireo vondrombahoakam-paritra itsinjaram-pahefana dia tsy maintsy atao mahasahana ny fitambaran'ireo andraikitra mifandray amin'ny tandrifim-pahefana nomena ary atao ho an'ny sokaji-na vondrombahoakam-paritra itsinjaram-pahefana iray izay ho tompon'andraikitra feno amin'izany.

Amin'izany, ny famindrana tsirairay dia atao ho an'ny ambaratonga-na vondrombahoakam-paritra itsinjaram-pahefana afaka hisahana kokoa ny tandrifim-pahefana voakasika raha miohatra amin'ny filan'ny mponina.

Ny famindrana dia atao miandalana arakaraky ny fahafaha-manaon'ireo vondrombahoakam-paritra itsinjaram-pahefana.

And. 23 – Ny fandanianamikasika ny fisahanana ny tandrifim-pahefana nafindra dia anaovanatombana mialoha eo ambany fanaraha-mason'ny vaomiera atsangana amin'ny alalan'ity lalàna fehizoro ityka ahitana ny solontenan'ireo Minisitery sy ireo manam-pahefana eny anivon'ny vondrom-bahoakam-paritra itsinjaram-pahefana.

And. 24 –Ny vaomiera voalaza ao amin'ny andininy faha-23 etsy ambony dia ahitana :

- ny solon-tena avy amin'ny Minisitery'ny Ati-tany sy ny Fitsinjaram-pahefana, Filoha ;
- ny solon-tena avy amin'ny Minisitery misahana ny vola sy ny tetibola, Mpikambana ;
- ny solon-tena avy amin'ny Minisitery misahana ny Asam-panjakana, Mpikambana ;
- ny solon-tena avy amin'ny Antenimieran-doholona, Mpikambana ;
- ny solon-tena avy amin'ny Antenimieram-pirenena, Mpikambana ;
- ny solon-tena avy amin'ny Fisafoana ankapoben'ny Fanjakana, Mpikambana ;
- ny solon-tena avy amin'ny/ireoMinisitery voakasiky ny tandrifim-pahefana nafindra, Mpikambana;
- ny solon-tena avy amin'ireo manam-pahefana eny anivon'ny vondrombahoakam-paritra itsinjaram-pahefana, Mpikambana ;

Ny fombafomba fampiharana ity andininy ity dia faritana amin'ny alalan'ny didy amam-pitsika.

And. 25 –Ny famindrana tandrifim-pahefana dia tsy maintsy ampiarahina amin'ny famindran'ny Fanjakana ho an'ireo vondrombahoakam-paritra itsinjaram-pahefana, ny fitaovana sy loharanom-bola ilaina amin'ny fisahanana araka ny tokony ho izy ireo tandrifim-pahefana ireo araka ny fepetra voalazan'ny lalàna.

Ny Fanjakana dia tsy maintsy miroso amin'izany famindrana izany.

Sokajy fahatelo **Ny amin'ny tandrifim-pahefan'ny Kaominina**

And. 26 – Araka ny fepetra voalazan'nyandininy faha-149 amin'ny Lalàmpanorenana, nyKaominina dia manohanany fampandrosoana ara-toekarena, ara-piaraha-monina, ara-kolontsaina sy ara-tontolo iainana ao amin'ny fari-piadidiany.

Ny tandrifim-pahefan'ny Kaominina dia mifantoka indrindra amin'ny foto-kevitra fanakaikezana, ny fitsinjarana, ny fironana, ny fampiroboroboana sy fiarovana ny tombotsoan'ny mponina.

And. 27 –Nysehatry ny tandrifim-pahefan'ny Kaominina dia miompana indrindra amin'ny :

1. famantarana ireo otrikarena sy ny filàna ara-toekarena, ara-piaraha-monina, ara-kolontsaina sy ara-tontolo iainana ary ny fanatanterahana ireo zavatra atao mifandraika amin'izany ;
2. fanantontosana ireo asa hafa rehetra tafiditra anatin'ny tandrifim-pahefany araka ny didy aman-dalàna manokana.

And. 28 –Ankoatr'ireo fepetra voalazan'ny andininyetsy aloha, ny Kaominina no misahana :

Eo amin'ny lafiny fitantanana-draharaham-panjakana :

- 1- ireo asafototra mikasika ny fitantanana-draharaham-panjakana sy ara-bola ;
- 2- ny fitantanana ny fananan'izy ireo manokana ;
- 3- ireo asa rehetra mifandraika amin'ny fiankohonana, fiantsoana ho miaramila, fanisana ny mponina ;
- 4- ny fanatanterahana ny fiaraha-miasa eo amin'ny samy Kaominina sy amin'ny vondrombahoakam-paritra any ivelany ary ny fampiroboroboana ny fiarahamiombon'antoka
- 5- fanantontosana ireo asa hafa rehetra tafiditra anatin'ny tandrifim-pahefany araka ny didy aman-dalàna manokana.

Eo amin'ny lafiny toekarena, ny fametrahana ny drafitra fampandrosoana ny Kaominina sy fanatanterahana ireo asa mifandraika amin'ny :

- 1- fanantontosana sy ny fitantanana ireo foto-drafitr'asa sy fampitaovana momba ny fivarotana toy ny toerana malalaka falehan'ny be sy ny maro, nytsenam-bahoaka, ny tsenan'omby sy ny toeram-piantsonan'ny fiarakodia, ary ireo fampitaovana rehetra mampidi-bola toy ny toerana famonoam-biby sy ny sehatra maintso ;
- 2- fitantanana ny làlana, ny làlan-kely mampifandray, ny tetezana sy ny baka ho an'ny tombotsoan'ny Kaominina ;
- 3- ny fizahan-tany eny ifotony ;

Eo amin'ny lafiny fiaraha-monina sy kolontsaina :

- 1- amin'ny fametrahana ny drafitra fampandrosoana ny Kaominina sy ny fanatanterahana ireo asa mifandraika amin'ny :
 - fitantanana ny fanaovan-dàlana, ny rano sy ny fanadiovana ny tanàna, ny fitrandremam-pahasalamana, ny fitantanana ny fako avy any an-tokantrano ;
 - fanatanterahana,amin'ny tandrifify azy, ireo asa sy fepetra saha mikasika ny ady amin'ny loza voajanahary ;
 - ny famaritana sy ny fanantontosana ireo fandaharan'asa momba ny trano fonenana sy ireo fampitaovana ho an'ny daholobean-tanàn-dehibe na ambanivohitra ;
 - fitantanana ny fitsinjarana ny trano fonenana ;
 - ny fandriampahalemana ifotony sy ny fiarovana ny mponina

- ny fanantotosana ireo asa sosialy indrindra ny amin'ny fanomezana tombony ireo olona manana fahasembanana, ny zokiolona sy ny olona sahiranaara-pivelomana ;
 - ny fitantanana ireo foto-drafitr'asa sy fampitaovana fototra ho an'ny daholobe ara-tsosialy, ara-panabeazana, ara-kolontsaina, sy ara-panatanjahan-tena ary ara-pahasalamana : akanin-jaza, sekoly fanabeazana fototra, sekoly ambaratonga faharoa ary tobim-pahasalamana fototra :
- 2- amin'ny fanantotosana sy ny fitantanana ny valasy sehatra fialam-boly saha ny Kaominina ;
- 3- ary ny fampiroboroana ireo kolontsaina mampiavaka.

Eo amin'ny lafiny tontolo iainana, ny fametrahana ny drafitra fampandrosoana ny Kaominina sy ny fanatanterahana ireo asa mifandraika amin'ny :

- 1- fandraisana anjara amin'ny fikajiana, fanomezan-danja, fitantanana ny tontolo iainana sy ny harena voajanahary ;
- 2- fisorohana sy ny ady amin'ny doro tanety sy ny fandripahana ny ala.

Sokajy fahefatra Ny amin'ny tandrifim-pahefan'ny Faritra

And. 29 –Araka ny voalazan'ny andininy faha-153 ao amin'ny Lalàmpanorenana, ny Faritra dia misahana ny momba ny toekarena sy ny sosialy.

Amin'ny alalan'ny fiaraha-miasa amin'ny rafitra ara-panjakana sy ny tsy miankina, ny Faritra no mitarika, manetsiketsika, mandrindra sy mandamina ny fampandrosoana ara-toekarena sy ny ara-tsosialy manerana ny fari-piadiadiany ary miantoka ny teti-pivoarana, ny fanajariana ny tany sy ny fanatanterahana ireo asa rehetra momba ny fampandrosoana.

And. 30 –Ny sehatry ny tandrifim-pahefan'ny Faritra dia mahakasika :

Eo amin'ny lafiny fitantanana-draharaham-panjakana :

- 1- ireo asa fototra mikasika ny fitantanana-draharaham-panjakana sy ara-bola ;
- 2- ny fitantanana ny fananan'izy ireo manokana ;
- 3- ny fanatanterahana ny fiaraha-miasa eo amin'ny samy Faritra sy amin'ny vondrombahoakam-paritra any ivelany ary ny fampiroboroana ny fiarahamiombon'antoka
- 4- fanantontosana ireo asa hafa rehetra tafiditra anatin'ny tandrifim-pahefany araka ny didy aman-dalàna manokana.

Eo amin'ny lafiny fampandrosoana ara-toekarena sy ara-tsosialy :

- 1- famantarana ny tondro laharam-pahamehana ho an'ny Faritra ;
- 2- famolavolana sy fanatanterahana ny fandaharan'asa lasitra sy ny drafitra fampandrosoana ny Faritra
- 3- fandaharana sy ny famaritana ireo asa fampandrosoana mahakasika ny Faritra indrindra ny lafiny fanajariana ny rano sy fambolena, ny jono, ny fampiroboroana ny indostria, ny asa tanana sy ny varotra, ny fampiroboroana ny sehatry ny asa, ny fambolena sy ny fiompiana ;
- 4- fandrafetana sy fanatanterahana ny drafi-paritra momba ny fanajariana ny tany ;

- 5- fampiroboroboana ny trano fonenana ;
- 6- ny fitantanana ireofampitaovana ho an'ny daholobe mahakasika ny Faritra indrindra ny lisea, ny tobim-pitsaboana mifanandrify amin'ny Faritra, ny làlana mahakasika ny tombotsoan'ny Faritra ;
- 7- fanatanterahana, amin'ny tandrify azy, ireo asa sy fepetra sahaza mikasika ny ady amin'ny loza voajanahary sy ny filaminam-bahoaka ;
- 8- amin'ny fanantotosana sy ny fitantanana ny vala sy sehatra fialam-boly sahaza nyFaritra.

Sokajy 5

Ny amin'ny tandrifim-pahefan'ny Faritany

And. 31 –Araka ny fepetra voalazan'ny andininy faha-157 ao amin'ny Lalàmpanorenana, ny Faritany no manatanteraka ny politikan'ny fampandrosoana mahakasika ny tombotsoan'ny Faritany nofaritana sy notinapaka teo amin'ny Filan-kevi-paritany. Izy no miantoka ny fandrindrana sy ny fandaminana ireo asa fampandrosoana ho an'ny tombotsoam-paritany ary mitsinjo ny fampandrosoana tsy mitanila sy mirindra ny vondrombahoakam-paritra itsinjaram-pahefana ao anatin'ny Faritany.

Amin'ny alalan'ny fiaraha-miasa amin'ny rafitra ara-panjakana sy ny tsy miankina, ny Faritany no mitarika, manetsiketsika, mandrindra sy mandamina ny fampandrosoana ara-toekarena sy ara-tsosialy manerana ny fari-piadiadiany ary miantoka ny teti-pivoarana, ny fanajariana ny tany sy ny fanatanterahana ireo asa rehetra momba ny fampandrosoana.

And. 32 –Ny Faritany dia misahana indrindra indrindra :

Eo amin'ny lafiny fitantanana-draharaham-panjakana :

- 1- ireo asa fototra mikasika ny fitantanana-draharaham-panjakana sy ara-bola ;
- 2- ny fitantanana ny fananan'izy ireo manokana ;
- 3- ny fanatanterahana ny fiaraha-miasa eo amin'ny samy Faritany sy amin'ny vondrombahoakam-paritra any ivelany ary ny fampiroboroboana ny fiarahamiombon'antoka ;
- 4- fanantontosana ireo asa hafa rehetra tafiditra anatin'ny tandrifim-pahefany.

Eo amin'ny lafiny fampandrosoana ara-toekarena sy ara-tsosialy :

- 1- famaritana sy nyfanatanterahana ny politikam-pampandrosoana ho tombotsoan'ny faritany ;
- 2- fanatanterahana, amin'ny tandrify azy, ireo asa sy fepetra sahaza mikasika ny ady amin'ny loza voajanahary sy ny filaminam-bahoaka ;
- 3- fampifandraisana sy ny fandaharana ireo asa fampandrosoana ny Faritany ;
- 4- fandrafetana sy fanatanterahana, amin'ny tandrify azy, ny drafitra momba ny fanajariana ny tany ;
- 5- fitantanana ireo fampitaovana ho an'ny daholobe natao ho an'ny Faritany, indrindra ny anjerimanontolom-panjakana, ny toeram-pitsaboana mifandray amin'ny anjerimanontolo, ny arabe ho an'ny tombotsoan'ny Faritany.

And. 33 –Didy amam-pitsipika no mametra ireo fepetra fampiharana ny tandrifim-pahefana voalaza ao amin'ity toko ity.

**TOKO FAHEFATRA
NY AMIN'NY FOMBAFOMBA FANDAMINANA
NY VONDROMBAHOAKAM-PARITRA ITSINJARAM-PAHEFANA**

And. 34 –Ny vondrombahoakam-paritra itsinjaram-pahefana dia mizaka ny zo eo anatrehan'ny lalàna, ary manana ny fizakan-tena ara-pitantanana sy ara-bola. Izy dia rafi-pitantanana miavaka amin'ny fitantanana-draharahan'ny Fanjakana foibe, ary mitantana ny raharahany malalaka amin'ny alalan'ny rafitra manokana.

And. 35 –Ny rafitry ny vondrombahoakam-paritra itsinjaram-pahefana dia :

- ny Antenimiera mpanapaka antsoina hoe “Filan-kevitra” ;
- ny rafitra mpanatanteraka.

And. 36 –Ny Filan-kevitra sy ny rafitra mpanatanteraka dia rafitra samy hafa ary manatanteraka araka izay tandrify azy ny asa fanapahana sy ny asa fanatanterahana eo anivon'ny vondrombahoakam-paritra itsinjaram-pahefana.

And. 37 –Eo anivon'ny Kaominina, ny asa fanapahana dia iandraiketan'ny Filan-kevitra monisipaly na kaominaly, araka ny maha Kaominina ambonivohitra na Kaominina ambanivohitra.

Ny asa fanatanterahanadia tarihin'ny Ben'ny tanàna.

Araka ny fepetra voalazan'ny andininy faha-152andalana farany amin'ny Lalàmpanorenana, ny solontenan'ny Fokontany dia mandray anjara amin'ny famolavolana ny fandaharan'asampampandrosoana ny Kaominina misy azy ireo.

And. 38 –Eo anivon'ny Faritra, ny asa fanapahana dia iandraiketan'ny Filan-kevi-paritra.

Ny asa fanatanterahana dia tarihin'ny Lehiben'ny Faritra.

Ny Solombavambahoaka sy ny Loholona voafidy na voatendry avy amin'ireo fari-piadian'ny Faritra dia mpikambana avy hatrany ao amin'ny Filan-kevi-paritra, ary manan-jo hanapa-kevitra.

Ny Loholona voafidy dia miketraka eo amin'ny Filankevi-paritra iray safidiany ao anatin'ny Faritany nahavoafidy azy, mandritra ny fotoam-piasany.

Ny loholona voatendry dia miketraka ao amin'ny Filan-kevi-paritra iray safidiany mandritra ny fotoam-piasany.

Ny Ben'ny Tanana sy ny Filohan'ny Filan-kevity ny Kaominina amin'ny renivohitr'ireo Distrika mandrafitra ny Faritra dia mandray anjara amin'ny fivoriana ara-potoanan'ny Filan-kevi-paritrandrindra amin'ny famolavolana ny fandaharan'asampampandrosoana ny Faritra, fa tsy manapa-kevitra.

And. 39 –Eo anivon'ny Faritany, ny asa fanapahana dia iandraiketan'ny Filan-kevi-paritany.

Ny asa fanatanterahana dia tarihin'ny Lehiben'ny Faritany.

Ny Solombavambahoaka sy ny Loholona voafidy na voatendry avy amin'ireo fari-piadian'ny Faritany dia mpikambana avy hatrany ao amin'ny Filan-kevi-paritany, ary manan-jo hanapa-kevitra.

Ny Lehiben'ny Faritra, ny Filohan'ny Filan-kevi-paritra sy ny Ben'ny tanàna amin'ireo Kaominina amin'ny renivohitry ny Faritramandrafitra ny Faritany dia mandray anjara amin'ny fivoriana ara-potoanan'ny Filan-kevi-paritanyindrindra amin'ny famolavolana ny fandaharan'asa fampandrosoana ny Faritany, fa tsy manapa-kevitra.

And. 40 –Ho fampiharana ny andininy faha 151, 156, 160 ao amin'ny Lalàmpanorenana, ny firafitra, ny fandaminana, ny anjara andraikitra sy ny fomba fiasan'ny rafitra mpanatanteraka sy mpanapakevitra eo anivon'ny Vondrombahoakam-paritra itsinjaram-pahefana ary koa ny fomba sy ny fepetra fifidianana ireo mpikambana ao aminy dia ferana amin'ny alalan'ny lalàna.

And. 41 –Ny rafi-pandaminana lasitraazo ampiharina isaky ny sokajy sy ambaratonga-na Vondrombahoakam-paritra itsinjaram-pahefana dia faritana amin'ny alalan'ny lalàna.

And. 42 –Didim-panjakana no mametra ny karazana sy ny taha farany ambonin'ireo tombotsoa sy tambin-karama omena ireo tompon'andraikitra ao amin'ny rafitra mpanatanteraka sy ireo mpikambana ao amin'ny Filan-kevity ny Vondrombahoakam-paritra itsinjaram-pahefana.

And. 43 –Ho fampiharana ny andininy faha 95 ao amin'ny Lalàmpanorenana, ny lalàna no mamaritra ny fotokevi-dehibe mikasika ny satan'ny mpiasam-panjakana raikitra eny anivon'ny Vondrombahoakam-paritra itsinjaram-pahefanaary mametraka ny fiantohana ara-tsata natokana ho azy ireo.

Ny Fanjakana dia tsy maintsy mametraka ivon-toeram-panofanana manokana ho azy ireo.

Didim-panjakana no mametra ny fitsipi-pitondrana manokana ho an'ny sokajin'asam-panjakana raikitra eny anivon'ny Vondrombahoakam-paritra itsinjaram-pahefana.

TOKO FAHADIMY

NY AMIN'IREO FOMBAFOMBA FAMPANDEHANAN-DRAHARAHANA ENY AMIN'NY VONDROMBAHOAKAM-PARITRA ITSINJARAM-PAHEFANA

And.44 –Ny Vondrombahoakam-paritra itsinjaram-pahefana dia malalaka amin'ny fitantanana ny raharaha tafiditra ao amin'ny tandrifim-pahefany amin'ny alalan'ny fanapahana raisin'ny Filan-kevitra voafidy.

And.45 – Ny famindrana ny tandrifim-pahefana dia mitarikafanomezana ho an'ireo Vondrombahoakam-paritra itsinjaram-pahefana ny hoenti-manana ara-pitaovana, ara-bola sy mpiasa ilaina amin'nyfisahananaizany.

Ireo sampandraharaham-panjakana na ny ampahany izay misahana tandrifim-pahefana manokana mahakasika ny vondrombahoakam-paritra itsinjaram-pahefana hatramin'izao dia afindra any aminy avy hatrany.

And.46 – Ny famindrana tandrifim-pahefana dia mitarika avy hatrany fanomezana tsy misy fepetra ho an'ny Vondrombahoakam-paritra itsinjaram-pahefana notolorana izany tandrifim-pahefana izany, fanana azo afindra sy fananana tsy azo afindra ilaina amin'ny fisahanana azy. Ny vondrombahoaka itsinjaram-pahefana amin'izany dia misolo ny Fanjakana amin'ny zo sy ny adidiny.

And.47 – Ny Fanjakana dia tsy maintsy mampiditra ao anatin'ny tahirin-kevity ny politika isan-tsehatra, ireo karazana tetik'asa sy asa azo tanterahina isaky ny ambaratonga-na Vondrombahoakam-paritra itsinjaram-pahefana natolony hodinihana na nisy na tsy nisy fiaraha-miasa amin'ny Fanjakana.

Raha toa ka tsy notakiana ny fiaraha-miasan'ny Fanjakana, dia tsy maintsy ankatoavina ny fenitra ara-tekinika na ara-pitantana araka ny sokajiny izay nofaritana eo amin'ny sehatra nasionaly.

Raha toa ka nangatahinany fiaraha-miasan'ny Fanjakana, ireo Minisitery voakasika no hisahana ny fanatanterahana ny fepetra voarakitra ao anatin'ny tahirin-kevitra politika araka ny sokajiny voalazan'ny andalana voalohany amin'ity andininy ity, indrindra ny eo amin'ny sehatra ny fampianarana, ny fahasalamana, ny fambolena sy ny fampandrosoana ny eny ambanivohitra, ny fizahan-tany, ny tanora sy ny fanatanjahan-tena, ny fanajariana ny tany sy ny asa vaventy, ny toekarena sy ny tetipivoarana.

And. 48—Vantany vao mivoaka ity lalana fehizoro ity, ny famindrana dia irosoana avy hatrany ary tohizan miandalana arakaraka ny fahafaha-manaon'ireo vondrombahoakam-paritra itsinjaram-pahefana.

And.49 –Ny fandaminana ny lafin-tanysy ny fitsinjarana andraikitra eo amin'ny Fanjakana foibe sy sampan-draharaham-panjakana anaparaham-pitondrana dia alamina araka ny foto-kevitra feran'ity toko ity.

And.50 – Ny fitantanana ny lafin-tany dia alamina, ao anatin'ny fanajana ny fitantanana malalaka an'ireo vondrombahoakam-paritra itsinjaram-pahefana, ahafahana manatanteraka ny fanajariana ny tany araka ny voafaritana ao amin'ny andininy faha 5 etsy ambony, iantohana ny demokrasia sy ny fitondrana ifotonyary anosehana ny fampandrosoana miainga avy any ifotony sy nyfanavaozana ny sampandraharaham-panjakana.

And.51 – Ny hany ankinina amin'ny Fitondraharaham-panjakana foibe dia ireo asa mahakasika ny firenena na koa ny fanatanterahana azy dia tsy azo anomezam-pahefana ny ambaratongampahafana eny anivon'ny lafin-tany.

Ny asa sasany, indrindra ireo mifehy ny fifandraisan'ny Fanjakana sy ny Vondrombahoakam-paritra itsinjaram-pahefana, dia omena ny sampandraharaham-panjakana anaparaham-pitondrana ny fanatanterahana azy.

Amin'izany, ny Fanjakana dia tsy maintsy manitatra ny andraikitr'ireo solon-tenany any amin'ny ambaratongampahafana eny anivon'ny lafin-tany,na eo amin'ny lafiny fampiharana ireo fitsipika ankapobeny nofaritany, na eo amin'ny fanaovana fifanekena ilaina amin'ny fandrindrana ireo asan'ny Fanjakana amin'ny an'ireo vondrombahoakam-paritra itsinjaram-pahefana.

And.52 – Ny Lalana no mametra ireo fombafomba fanatanterahana ny fanaparaham-pitondrana, ny fanomezana andraikitra ataon'ny Fitondran-draharaham-panjakana foibe ho an'ireo sampan-draharaham-panjakana anaparaham-pitondrana ary ny foto-kevidehibe entina mandaminana ireo sampan-draharaham-panjakana anaparaham-pitondrana.

Didim-panjakana raisina eo ampivorian'ny Filan-kevity ny Minisitry no mametra ny isa sy ny famaritana ireo fari-piadidiam-panjakana.

**TOKO FAHAENINA
FEPETRA FARANY**

And.53 – Foanana ary dia foana ireo fepetra teo aloha mifanohitra amin'ity lalana fehizoro ity, indrindra ny lalana nasiam-panovana laharana faha 93-005 tamin'ny 26 janoary 1994 anaovana sordalana ankapobeny ny politikan'ny fitsinjaram-pahefana.

And.54 – Ity lalana fehizoro ity dia havoaka ao amin'ny gazetim-panjakanan'ny Repoblika.

Hotanterahina izany fa Lalana fehizoron'ny Fanjakana.

Navoaka hanan-kery teto Antananarivo ny